

vñ widerüb auß dē niderigern her auß. Zūgleich in disen tagē wirt es in ein tieffe ren schacht gossen / vñ so ein schacht dazwüschē / fleußt es herab in den niderigē stollen / vñ fleußt auß dē selbigen widerüb her auß. Aber im Herbst vnd Winter zeit / ghet es widerumb in den niderigern stollē oder schacht ein / vñ auß dē tieffe ren widerumb her auß. Aber dise enderung des wetters geschicht in den landtschafftē vñ örtern die temperiert seindt / zū anfang des Lenzes / vñ am endt des herbstes. Im Kaltē aber / im endt des Lenzes / vñ im anfang des herbstes. Das wetter aber zū beider zeit / eb es sein gwonliche gang bstendig hellt / wirt innert halb vierzehen tagen zum offtermals verenderet / dan ein malē zeucht es in den tieffern schacht oder stollen / das ander mal aber widerüb zum niderigsten her auß. Aber von disem sey nuhn gnügsamlich gesagt / jez wollen wir andere ding handeln. Der schächten seindt zweierley art / einer hat ein tieffe wie vormalts beschryben / deren schächten in einer gruben viel pflegendt zū sein / sonderlich wan sie die stollen erreichen / vñnd die selbige gruben von metall reich ist. Als dan so man mitt dē ersten schacht den ersten stollen erlangt / werdē zwen ander schächte gfuncken / ja woll drey zū zeiten / so das hauwen durch menge der wasserren ver hinderet wirt / das einer seye an statt des stumpffs / damitt in den anderen zweien schächten das werck des hauwens so angefangen / möge vollbracht werden. Dis geschicht auch im anderē stollē / auch im dritten oder vierdten / wan so viel in das gebirg getriben worden seindt. Aber die ander art der schächten ist sehr tieff / als nemlich bey sechzig / oder achtzig / od hundert lachtern / welche schächt seiger gericht in die tieffe fallendt / vnd mitt einem seill werden die außgehauwen stein / vnd das arz her auß gezogen. Von dessen wegen / heissendt die bergtleut die schächt / richt schächt. Ober dise werden zeug gesetzt / mitt welchen das wasser außgeschöpfft wirt / vñnd gwonlich vnderem blossen Hiñell / welche die pferdt umbtreibe / in den stollen aber die anderen welche gemeinglich der gwalt des wassers treibet. Sölche schächt aber werdenn als dann gehauwen / wann der gang reich am arz ist. Es werdenn aber schächt sie seyen wie sie wollen / in mancherley weiß auffgefürt. Dan so ein gang vest ist / vnd auch das gstein des hangenden vñnd ligendenn / so darff es nicht viel gebewes / sonder es werdenn allein tragstempffell gesetzt / vnder welchem andere joch ins hangendt / in die gstein gschlagenn / andere ins ligendt ggeschlossen werdenn / an den hölzger die disenach bey den ligenden auffgesetzt abtritt vnd fartten gschlagen. Aber die abtritt / vnd die zū beiden seitē den schacht von dem gang / vñnd dem anderen teil / dessen da die fahrt seindt / absunderen / die selbigen werdenn an die pfulbeume gschlagen / vnd halten den gang / das nicht des selbigen schollen durchs wasser zerschmolzē / in den schacht fallen / vñ von beide örtern / die heuwer mit sampt beiden arbeitern / die von der anderen seitten hinab vñ her auff farendt / erschrecken vnd verletzen / oder herab werffendt / dise aber hauwen auß die schollen des gesteins / welche so sie außgezogen werden / auß den fassen oder korbē fallendt / vnd thündt eben auß disen ursachē die selbigen von den fartē. Weiter so thündt sie das darumb / das nicht so schrecklich / noch so gferlich / das schwär vñnd hoch abfaren vnd aufffaren seye. So aber ein gang schnättig ist / vnd das gstein des hangendens vñnd ligendens weich / so bedarff es viel vnd offters bauwens / derhalben schlecht man iocher zūsamē / vnd setz sie nach einander / welcher zweierley weiß ist. Dan einweders iocher der pfulbeumen / so auß dem hangendē zum ligenden reichen / werden in die jocher der pfulbeumen die bey den hangenden vnd ligenden seindt eingeschlossen / oder das ein oben / vnd das ander vñndē auß gehauwen / vnd die selbigen werden in dise gelegt / der jocher schwäre last halten die tragstempffell / so dazwüschē einander nach gesetzt / welche in das gehenge des ligendens vnd hangendens / gar hinein ggeschlossen seindt. Das aber sölche jocher vest bleybendt / so schlecht man schwarzen / vnd hültzene teill zwüschen inen vnd des gangs seitten / vnd sein hangendens vnd ligendens / vnd das lähr ist / füllet man

man